

五百四峯堂詩鈔

五百四峯堂詩鈔

卷之十

順德黎 簡簡民撰

庚子年

春思

村風拂香路芳意與雲濃
柳弱春人帶花填繡屨
蹤迴光媚波淺深笑盡簾重可費東南日羅敷暖
照胸

細雨

淑風深送暖春日淺含情細雨光猶暗孤花凍益
明林攢遠峯立雲重暮沙平村路香泥滑烟簑試
早咍

未起

喚起故未起曉禽鳴屋山涉江歸夢遠欹枕愧春
閑暖樹深窻色幽花病婦顏故人遊興好書札動

堅關

友人約
遊羅浮

春望寄郭山人

黯黯長江外滔滔落日圓高棉照芳草青紫各黏

天詩思堤鶯後春愁海燕前郊民暇給否花鳥故

暄妍

郊民樂
郊白謂

寄贈麥瑞石

天植

瑞石山人詩立名萬松聲洵著書亭亭前松杪海
水白吟裏酒杯山影青深判干時大潦倒淺學觀
化棲沉冥呶呶狂醉吁可畏高臥風花君勿聽

春江吟

雲英著水絲交加水暖浪香魚嚼花春人意重丹
槳弱暗柳迷天還妾家菱潭飛鷺破春碧江日照

寒晚風色道傷但使愁煞人不使嬌名與人識
菖蒲新芽五寸長日夕水邊抽斷腸

亡妹生日

死後尙生辰生辰哭死人死長生趣短生近死年
新邊塚鄰飢鬼南魂眷老親滄江斷雲下揮淚雨

青春

妹死時值
西粵大飢

無筆歌戲張榮夫顏貽光

二樵先生坐抱鄰曾有好畫無好筆筵中禿豪三
萬竿已向人閒散名物去年秋風病花里今年花

殘未曾出嚴冬典裘佐藥鼎手指棘刺二百日日
來病去呼洗硯擬賣溪山養清骨窮居夙痼相如
渴千人私笑楊雄吃童子反能譏主人報有其三
缺其一海上青峯青欲飛壓我簷端綠漂拂江扉
不掩海色寒公然排闥來入室時序易過興易盡
忍負湖山空突兀幸畱一枝絕柔小頗貌春螺上
初月無膠修飾慰殘懶勿笑戇妄惟我發却惜往
時空擲管不曾黑紙已白髮

病

相憐遂同病同病更相憐枕共花簷雨房分藥鼎
烟苦心長短夜瘦影十餘年與爾除諸妄清齋繡
佛前

憶郭山人

花笑重簷燕語雲芳時長憶郭山人碧畦賣菜門
前雨蒼壁垂藤瓦背春孤榻衆香亭子夢晴堦五
色畫孟塵年來痼癖應同病滿貯烟巒不庇身

草堂

茅堂不修飾草草寄花里陰湖上層雲虛壁動積

水松棚礙諸峯峯影直潭底西樵忽破碎風濤九
江起當籬故人舟力疾揖而止衣漬水雲白櫂繡
礪花紫我身一塵小我室一草靡棲弱六合中趣
舍孰彼此皇天何私心於茲亦生死豈無求安念
是宅終可喜哀樂吾猶人窮達本天理

湘竹吟

昔泛湘舟弄寒玉神娥亭亭萬波綠九疑月壇夜
肅肅清猿一聲脫秋木曉來神氣千里凝飄風靈
雨下洞庭方墀移植宜我夢夢中隱隱君山青霜

濤颿沓墻壁響南到滄江猶怨聲青春暮雲抽空
碧此夜湘陰波黑色金支翠旗寒不光夏露啼烟
絕人跡

不寐

不寐愁三夜勞生底息機風長雲亦厭江濶月無
依綠鬢宜先路青山誤早歸吾衣與吾馬京洛任
輕肥

廣州有傳予作古者及見呂石颿黃虛舟
顏菊湖始驚喜尙在廼爲此詩

生死何輕重而煩路上人諸君皆不欲一命尙宜
貧故國關山夢經年藥餌身定勞張孟輩禮意重
交親

張葯房贈筆卽作畫答之

不死友朋喜此生貧病餘作歌新有筆爲客舊無
魚坐久傷心話形疲試腕初雲山與年壽長在謂
何如

與黃虛舟

已恐士失志永憂身後名安知所流傳得及吾再

生與子受天竄遺形落南溟苦樂雖異勢相期如
弟兄顧我有吟作散失爲殘星才力百倍我我長
爾十齡當及見我死惜我書未成護我囊中詩若
護膝下嬰感此生死義千秋涕縱橫鬢絲日月改
心血波濤驚愚賤三十餘鄉夢東西征長吁謝知
已實愧衣衿青野人坐駕馭轉被賢達輕平昔擅
圖畫水墨無世情豈知折腰具師資玷關荆今當
破故懶答子愛我誠寧惟子孫保庶兼山水盟蹇
抑多病軀造化難與爭交心靡存歿薄藝如生平

春暮寄示閨人病中二首

別里仲春寒思歸春已殘
落花虛月徑飛夢近風
瀾病勉辭蔬食憂聊倚藥
九年來更輕別拘束候
當官

寄書頻草率同病兩支離
情語防人笑微病阻汝
知計疎無穩別眠數足
沉思豈謂歸難得歸難得
自治

近憂又寄

昔多高蹈志奈是近憂人
小別如千里無言况暮

春落花君病起漫海客愁新莫自勞清夢江天風
露晨

清明廣州作

紙錢散野一何似百里碧潭飛白鷗隔世死生真
別境洽旬哀樂且人閒酒醒北郭風花路夢斷西
淋夜雨山漠漠春潮亂帆影粵兒十郡壓船還

廣州僦居樓上作歌贈石帆虛舟兼懷周

令北上

南風江雲洶雨色千里亭亭入城黑東邊一角日

漏光雨脚西走樓中央陰晴滿目滯吾子蟲臂鼠

肝哀我死已拋一世等一夢那怪流言若流水

村居半年不入州府有傳予已死者東風幾日吹墓紙迴首荒山誰

免此遲速人命朝暮耳爲君酒盡歌蒿里春簷夜

雨更鼓寒百年幾得相團圞他時白髮殘漏急何

有青春高閣閑五丁昨夜開羣山

時作蜀棧圖與石帆

雲氣

抱座衣裳單好山惜是倦游得故人去此何時還

西夢岷峨入天去經過北海新題墓

李南澗

東望滄

江入地深不見南樓賦詩處南樓賦詩友朋缺中

原送人死生別明朝北郭看上墳眼中誰非離別人

得內人病中書

夢魂四十夜午睡且相尋病久無驚狀離多疲怨
心蕩芥寧造命兒女未辭襟慚坐南樓雨終宵河
水深

穉女芸生兩歲耳今年正月廿四日母方
咽湯藥歎無下藥物芸密取卓上錢過
橋買棗而進心哀憐之今四月內子病

書至憶而作詩

憐爾生貧家出世不識驕漫養遂言步稍免瘦母
勞破笑已萬端恒啼無幾朝悄然蓬室居暄和出
蕭條絕似阿姊時剪紙紛紅飄不知指弱細屢自
嗔剪刀雖未成花蝶名狀強自標倒卷學問字掩
面將過腰始投慈母懷遂弄阿姊髻慈母病撫汝
肉澀無脂膏天真日漸露亦頗固齒毛汝母藥爲
命是藥參薑椒支床停皺眉淚下視飲瓢汝時竟
何思心瞭舌未調真愛不以態直去如無聊潛步

三尺影花墀紅翠交出門濕衣露匍匐上板橋投
錢致呼物虎鞵泥已膠四棗實兩掌歸猶藥烟高
語娘一字棗餘詞半咬咬慈母極驚怪相視旋悲
恹數問惟點頭拽母雙手牢阿耶至性淺汝祖常
波濤何當及長大禮訓熟使操離家今月餘書至
增鬱陶空囊忍未歸實恐饑汝曹別來於語言明
了差不淆恃汝勝藥物須姊教歌謠或記我小詩
勿弄籬外潮扶床戲娘側勿增娘寂寥

滄江舟中同呂石颿黃虛舟及其姪秀才

曉徵 玉霞

上下二十里船壓雙塔影暮潮翻孤光赤浪火萬
頃千丈亘西雲寸碧汎東嶺夕陽竟天過遠嶂走
光炯樹黑暗帆惑海破隙月警稍見檣杪明旋動
襟上冷別久得長會道合無逆領水濶燈燄小語
壯人境靜渚禽露飛白草蠶濕鳴醒何當波羅亭
弄日暖樹頂

萬里亭贈石颿

番禺東圃江上新名亭

萬里亭邊水歸來萬里人乾坤漸空濶風浪幾交

親山劃東南線田多溟泮塵積波虎頭砦期與砥
當津

浴日亭

海曉雲壓水上有山壓雲晨颺轉欹帆萬嶺懸空
奔夜約弄曙曦睡起已半晨孤峯抱萬木昨葉娟
古皴暄色炙亭瓦綠薜含日痕枉步就陰磴免局
虎豹蹲連山湧蒼濤西北赴海門指顧不敢走對
立勒兩軍東南劃之平坦掌入絕垠地勢萬里上
蓄此一阜尊他山互爭雄不得當要津西眷疊後

嶂簷角日易昏迴光蕩東溟呼吸陰火焚日出與
日入同奇乃殊聞我來晚孤賞庶與識者言呂生
古狂士才力大負掀題詩感神靈雲旗颯風翻鞚
作銅鼓鳴海山相輦軒倏與林巒辭忽繼生死論
北海桐棺深南海棗刻存李南澗題廟云法物
將軍鼓鴻文刺史碑風雨蕪廊寒恐有碑陰魂

別虛舟二首

日照城門君出城四更樓月澹新晴滿城雲氣深
談在一夜風潮已暗生

昨日椎碑浴日亭掠簷斜照下東溟禁他水上亭
前白別汝山來夢裏青

贈張藥洲

會別三年內升沉一歎中有言無敘節多病少遭
逢夜酒寒兼雨晚花愁更風悲歌不可得亦未得
虛空

入門

熟知風波勞久與貧賤適艤籬葭蒲涼迴首天海
黑幸收一帆弱不與風雨敵入門見藥烟穉子靜

無色病婦爲拂衣塵厚無氣力握手一長歎使汝
至此極欲從病中說病境如異域倦視耐永望瘦
淚剩殘滴桐花雜海雨騷索入昏夕四月漫北風
纖骨驚寒席

雨

漠漠海上雨愁坐雨汗漫孤舟破晴波昨日上村
岸故人送我時水氣潤已散波日搖城門別袂水
光爛入舟未五里黑嶂塞天半遙知會城深高樓
翳風慢海遠指奔雨八垠一帆轉羃羃雲頭頽灑

灑日脚斷我舟得平恬方面周壯觀不爾堂膠芥
遭此鬼拽鑽入門免晞衣忽淋雨昏旦沉暝擁寒
衾安識雲日晏

夜話

月籬花影亂秋潮兩度桐陰得此宵久病傷心如
隔世淺寒驚骨似春朝江天白露勞纖夢洲渚青
蘋送短橈莫檢空囊吾道拙明霞苦栢佐鐺瓢

江上懷蘇其詹

日落江上山積水生半陰澹澹葭葦風涼意迎沙

禽昨夢五山笛雲氣孤城深不見嘯泉子惟聞天
外音

調呂石帆

呂生古之狂天性貧者俠安能賜生銅助汝荷死
鋪爛漫糜日月狂病標花葉十千市兒資不抵一
匙呷百萬富人產畱與幾筋挾雖奈藜藿命不噤
波濤頰北城蒿閑地東門火抄篋戊戌介卿居東門而災移
家住南村未得乞食業猶謀折腰米莫聽素心屨
昨於羊城中久邀雞窓狎小閣約爨烟熱帳借風

筵悲歌雄一代逆浪漲三峽莊生驚屠龍韓子咤
食蛤或鏤豪璣瓏或擘山巢業幽篁鬼嘯雨巖陣
犀漆甲掌故剔薜榛腕力使鳬鴨已奇千篇傳未
率一韻押深惜君半生學究佛百刼感恩分餘廩
青衿掣尊脇知己於鴻文白眼變和厯借問士爲
用誠是心所洽儻拾蓬閒螢槩付夢中蝶悠悠此
身名草草等漁獵何以答真宰未濟如病涉宏達
非一時富貴無兩睫虛舟容嵩衡從彼量廣狹

村望

蒼然萬木外，洶湧海雲高。
澤雨傾天走，滄波竟地淘。
茅茨孤艇弱，江樹仄帆牢。
獨立生飛動，心兼物象勞。

五月八日村中作寄廣州二三友

晚飯過暑雨，月上猶江聲。
涼色匝深樹，平林一邊明。
光溪應宿鳥，暗岸增流螢。
沙雲水氣白，蘚橋人跡青。
近春答遠吠，熟途阻紆行。
入巷梧影出，叩門機響停。
中宵語勞役，寸光懸弱檠。
復見萬木合，遙下千江鳴。
臥惜久別花，重垂無力藤。
破幃夢君子。

大河喧壓城

溪上摘荔枝作一絕

青蟬急翼風日夕荔枝紅

粵謠鴉蟬
叫荔枝熟

照水千人指

殘陽一樹空

羊額村夜遭黃虛舟次日兼寄銘南葭洲

兩何君

又此勞生小暫停况當如夢夜冥冥繫舟水隔簾

葭白照面燈連橘柚青

羊額柚
鄉也

東道窺園應有主

銘南北郊偕隱與名亭坐需澤國秦樓日孤絕滄

洲海客星

葭洲與其妻陳靜齋移居村之北郊

寄蘇嘯泉

山頭城影碧鑑水湖中月色金榜山嘯泉先生坐
憶我天水淨照相思顏魚塘海闊草堂小橫江風
浪舟楫少欲來不來病踟躕長眠短眠夢顛倒前
年寄我作長句我三四讀未了了溟渤低昂萬頃
雪中有神龍飛天矯篇終何處着一想水山海樹
號悲鳥知君於我眼青青使我於詩髮俱縞胡生
已死作者誰君力許我誰與之有生虛生我心悔

未死道死君涕垂番禺呂生當世奇三城哭我後
有詩昨同南樓一月雨笑泣閒作無人知半生看
已富篇什一信未抵紛讒疑嗟予多病恐先汝得
二子者吾誰欺會須身後付吾黨不那別來成舊
時西山雲壑嘯泉南村樹石帆夜色蒼蒼迥何處忍約
離憂與釣竿一櫂青簑濕花露

荔子再摘作

三日滿家食望林紅更殷物情憐盡取天道計空
還香熟添蜂鳥繁生益面顏兒童恣手口廻首慰

饒頑

三摘作

水碧不着眼殘紅饑鳥餘實繁從飽物風落似跳
魚掉首羣兒厭驚心萬樹疎浮生幾回食所得半
盈虛

南海神廟懷亡友李南澗

海日入殿光瓏璵翻波盪日飛赤虹繞楹抱棟不
得住蛟螭四走光熊熊衮衣流雲月滿容心約一
寸肅萬松晦明雲霧寒歛面如有神物循人踪鉤

瘦大叩鳴綠銅十仞殿壁鞿轆空徘徊外視白一
氣海色直入陰晴中寧知萬年黑波底猶有法物
羈求雄雨簷風廊建文石刺史一版墨薜濃昂藏
古貌如老翁其餘高卑若兒童摩挲未有氈槌從
掌至汗石不可通忽來感逝憂叢叢大雲山人出
山東南來碑版撝盡是地昔曾來此公嗚呼遺
墨近未脫湘灘魂魄棲何峯昔聞一鼓走滄海滄
海陵谷重相逢焉能招魂致鬼友起爾靈氣尋靈
宮文魚青虬足水國霞衣霓裳朝海宗髯乎揮手

入浩蕩神與遊戲於無宿送之颯去遂千古出入
侍從雙虹龍蓮花師子山色晚頽景千里層波紅
翕然光歛水氣上顧眎去帶寒有風茲遊忽感生
死別此生恐以多情終

庚子生日

吾年三十四半度客中春倍得向來日便爲中壽
人含情邈今古受命足風塵歌詠江聲裏悠悠自
苦辛

檢李南淵手札

慰離方有問長別豈宜看祖道三畱宿餘生一換
官宦情丹壁上病語白雲端往日書迢遞歸魂路
更難

喜仇上舍滙洲還自豫章蔡氏幕過問狂
簡一見卽歸勒竹村却寄

大江西來南叩關耳猶白波身碧山十年不見嶺
外雪今見於子鬢髯閒故人有官子有命前路得
歸後得閑東風梅花二月殘待子不來來已酸官
人渴涎食梅子憐其三年兩度寒我送子行戍之

臘庚夏之杪子旣還城西東主竹西館館柳似識
離人顏凝睇將逆若有語謂我情富君情慳憶昔
十年各林臥夜舟數下蘆花灣江風山氣月照面
不上子屋子上船秋衣裝綿堅坐得耐可取琴爲
子彈是時未會鬚鬚黑今日忽覺差差斑客腹謝
餐五斗米歸魂屢墮十八灘自是高枕無不安我
尙破被懸波瀾萬里生死夢百端怖怪不已猶風
湍綠梧村日照早食妻兒在廬驚定看

溪山無盡圖

山人無事胸兀岬大披濃抹溪山出野草低偃天
風高下走長坡路迴屈自時面壁已三日兩峯忽
上爭開張缺者氣競完者長盡令中幅剝障礙直
視已恐入大荒萬里退勢孤亭當此亭可以觀浴
日憶我與呂生吞若八九獅子洋

至廣州遂不寐數夜矣

危心無適體會處轉離思來顧糧幾絕眠稀夢不
知高城難早日盈橐易新詩歲歲驕賢婦能禁好
此奇

七月日得家君子示

八口歸來路幾千長途何地好林泉滄江雨色雲

低處白髮天涯日暮船殘卷似焦桐尾火

予家藏書於邑

州被火

孤墳畱哭象山鵲

謂亡妹

杜陵詩是吾家事工

墨頻儲本分錢

調陳湘舟

不知今有陳湘舟一日費爾幾掉頭君知近有二
樵子一世傳幾回死惟君青眼見我生讀詩首
肯讓我名高歌險語走萬里山作其骨江作聲美

人空山怨幽草細入於髮抽柔情不能使世撓所
好亦不以我能撓卿君家絕才棄依傍柳綿愁人
水蕩蕩光風動日轉蘭蕙仙客吹笙隔雲壤君謂
身名太鞅掌我坐饑寒慚偃仰看君微笑誰寄身
花裏維摩病無恙

曉出村舟中作

懸山覆水不到水水雲似海不似雲一身自作海
上客此山離立雲中君江雲漸高山漸小初日平
鋪萬波曉須臾山在金碧中全見山腰失山杪八

風忽展東南溟天水光白山光青張帆看山勢爭
轉瘦約一束空亭亭烟螺似我病婦態相送遠近
同含情我於山水矜畫手如此深陷畫未成山阿
片雲釀水氣欲出未出遲不輕祇應今夜客獨宿
始肯入城爲雨聲

客心

客心勞似江上葉日夕苦吟江上風小作秋聲警
炎熱早知寒氣約虛空飄零詩卷關天意顏禿雲
林廢鬼工且放尊前鄭公醉莫論身後曼卿窮

與劉翼雲

天鶴

莫愛樵夫嗜苦吟詩名寧復與身心夢魂長見前途險江海無如去日深似爾飛騰當入古見余疎散不宜今青楓別浦書三印黃葉秋城歲一尋

江上行

湖上秋光濶無着約束結成明月團莽然白波紅樹閒爛漫灑爲千里寒孤舟兩槳動夜色波響似碎玻璃盤鵝潭亂渡半滅火鴈背早警新涼天歌人昔時妙管絃人去田田荷葉殘雲巒百點千點

碧沙渚兩抹三抹烟故人柳絲書館前白馬夜鳴
月照川一聲馬鳴志士老胸中砢砢撐秋山自將
滿酌醉江水我意欲道終長歎人生多情足秋感
娟娟江月缺復圓好月願勿傷心看

漢騶氏鏡子歌爲葯房作

葯房好古南士無中原歸載周秦書校書不校漢
魏後買鏡乃買金石餘腥苔深青土蝕死古月歛
質金聲枯迴環未虧徑七寸持照夢若層雲膚得
無中有古人影隱隱不出或可呼何如相背乃妙

絕非篆非隸周邊隅其文曰騶氏作鏡續三四語
奇以迂紐傍四置識形貌云是吳越人物圖吳王
坐侍越二女句踐離立如羈孤不孤傍有范大夫
就中奮袖體格粗特銘忠臣伍子胥如此範式胡
爲乎我聞黃帝鏡十五王母十二傳最初西京柄
鏡亦罕覩東漢鐵錯製絕殊君今此寶乃在世窺
作者意非區區請君摩拭純銀塗刮剔銚澀開模
糊空堂晝晦雲壓廬風雨颯颯百怪趨剗然海月
破壁出如以定水懸空虛波浪不動龍遺珠峯巒

乍入屋在湖澄澄四楹肅物象嶢嶢七尺軒眉鬚
君言堅綠不可殺如此手澤光不汙不見南人一
丈鏡玻璃似碑檀作跌昨日高堂換新主照見舊
人行路衢吁嗟嗜此余誠愚漢家銅鼓沉水底投
以其類余忽如年深恐化海中月龍宮謂是真蟾
蜍海復爲陸歸農夫農夫不識還棄諸乃知奇物
匪人得鏡乎庶與造化俱

居西郭石帆來問

天地莽莽開子以貧賤至子而不過我我亦續前

睡大江動微秋五郡冷海氣昨夜嚴城鐘百里夢
破碎起視江上月水色互天地客孤夜寒澗城高
曙光大君來已增感雲露况陵厲論詩遠千古顧
影愁一對清時不能狂坐困家室計妻兒賊中來
細訴南村事官舶如白衣軍號無赤幟是境蜂有
毒到處狗不吠茲來就安食始覺賢婦智是時官兵圍番
蜀菱塘余家半月別昨日一書寄妻病如秋柴憐彼
膝下穉饑來自能食破袷寒白衣小女解勸娘今
年僅三歲大女已十齡藥苦慣嘗試厨下小奴婢

瑣屑拂人意勞勞兩窮措靡靡萬俗累今夜同被
眠魂夢無乃異宵殘尙太息明日身曷實出門秋
空高白日照行袂行歌向風塵浮雲與時逝方舟
橫江波鰕鮓恣游戲滄海無巨魚餌糟亦何冀悠
哉心如旌日夕勞已瘁

苦熱行

萬物不動日影直直如火弩射透石東南三日雨
雲積巉天拔海移不得嗟爾風聲死無力大壑水
枯龍呀口長林葉病鳥跼翼白帝扶桑挾弓矢九

烏猖獗不能射雲旗畫卷未肯開萬里無陰閣秋色熱河已恐浪沸火陰山何時雪如席客居所居江潦平赤流不流無水聲破幃夜夢林水濶涼天在湖深且清貝宮夫人居水晶風裳水珮集湘女珠飯玉酒頒瑤京長松十萬青似城盡作風勢波飛崩玲瓏仰視鱗瓦屋瓦上浪走沖沖水塔爾不覺結九夏冷然將以過一生氓蚘百萬雷激碭夢斷不暇作惘悵退金進鼓恣戰攻高壘深溝匝幃帳咂膚一刺無不親空空快劍無比倫沉沉中夜

自一擱不快而辱生愁嘆何況心血如煎焚汗落
枕氣蒸暗雲嗚呼何爲奔走一至此此境豈可容
卿身君不見日來城上十丈塵紅紫壓空成毒氛
歸哉水田風動蘋入門暮潮生屋根秋梧涼陰漾
白石樹下晚飯雞隨人

病馬

病馬老樹下葉稀霜滿身悲嘶寒入骨餘力病無
人枯草空酬命秋風遠起塵猶能一瞋目垂死見
精神

去家

去家無百里入夢有千端
身並妻兒瘦秋先疾病
寒行踪持道在詩草遲人彈
未自忘情得憂心愧
達觀

與薑臣夜話

柳枝星光天下白芙蓉露重花上寒
一世幾秋秋
幾夜開門愁接海瀾漫

雜憶絕句八首

夜香藤蔓上牆頭
蟻住濃黃簇作毬
三載一回看

汝得淡風香語去年秋

梧桐漣葉響玻瓈黃落聲中有病妻往日清陰敷
晚食嬌雛襟下走黃雞

敗荷猶剩幾竿斜不見人歸豈見花泥下馬蹄禁
冷著小抽通榦護霜芽

淮南仙種幽香桂昌谷饑糧小甲蔬幾日秋風詩
思闕竹窓誰爲護巴且

餘地猶堪墾木田一家香釀藥爐烟荆妻多病於
夫壻屢懊村人寄藥錢

阿瓊生小檢形骸九歲鐫花自繡鞋便拉阿芸教
點字不防慈母佛前齋

日落城頭天半黃平啣山缺下江光秋空寒色起
何處滿地江湖抱柳堂

歸思窮愁落葉邊三秋一月五更眠不知目痛難
書字夜夜題詩淚染箋

柳下

楊柳含情樹情人况暮秋江天最闊處風露五更
頭地白人憐影根虛浪拍舟病蟬如病客無語若

無愁

廣州歌

勞煞阿儂將水稱城南水重對河輕一雙紅鯉吸

人影飲水自然人有情

俗傳城西南之水與對河水量而稱之甕輕數兩云

遠城駘蕩柳毵毵映水女兒紅汗衫向晚擢花春

浪輭香雲先渡白鵝潭

遠簇山光入水光熱心禁得住清涼方花訶子連

珠結緊抱心頭到死藏

千株高柳礙斜陽半海青陰半海黃生小不經雞

三才集卷之二
三
鴨渚送行今出鳳凰岡

有所思

時時有所思
吾自不能知
生性元幽怨
行吟卽別離
情多心不受
病久影增疑
况是秋風夜
隨人著柳絲

寄石帆

一臥柳絲書館上
病餘人物競秋容
潮聲鞞鞫官街鼓
身事分明海寺鐘
吟咏氣平心有悔
疎狂名闊貌爲恭
窮途潦草逢知己
幕下虛羅禮意慵

秋雨柳絲書館作

書堂風檻大江橫
江雨過江先有聲
雲深樹黑去如掃
枯瓦暝蓬來復驚
故園竹屋迸哀玉
故人板扉危夜檠
冷肌白袷擁歸思
歸倚野橋秋水生

雨夜起居石帆

秋聲塞東南海氣
黑漠漠波力欲到天
其勢廼肯落江雲
壓孤簷寒重夜火弱
濕葉成波瀾疊洶拍
屋脚屋虛如輕舟
心驚坐漂泊故園
衆芳悴大化厭已
削我亭瘦槎枒葉
厚重茅薄介卿所
僦廬接

武就山郭

山郭郭山人自稱

是時粵山松天恣厥磅礴寢

食於怒威屋瓦恐揮霍不暇夢我病爾病睡不著
而我寄津館有眠靡遺析多思反蒼黃無事謝妄
錯智困生忍憇吟切露愧忤今夜海濱人心耳互
作惡愁惟憶君詩勞屢糜我藥何當披衣來義理
雜譬譴秋窓展江湖萬象靜可約

短歌

悲風揭滄溟萬物振動自苦勞高臺亂蓬中落日
盪帖萬里濤重雲壓鴈背飛鳴不得高秋陰海上

挾暮寒蒼然下散於江郊莽莽此天地我於其中
憂且牢西景已汨汨東流亦滔滔孤心入萬象我
何懷兮歌且謠

謝秀才雲隱

殷揚

致二樵山人書畫紙酬

答二首

此技世所棄此人君乃私代爲家食計特過草堂
貲與寫平生夢兼鈔廿載詩寂寥交誼在時照雪
霜姿

便能來百番未必遂千年憊澹勞風雨虛空助海

天病無心贍血賣有藥還錢自詡倪王筆君堂得
隋懸

題寄

萬樹綠圍花百花香繞家葉稀草閣出江急布帆
斜昨夢愁時入殘機病裏賒女兒清課熟齋日供
新茶

渡江

城南燈火處水黑萬星明初月低沉槳光雲薄照
城波寒醒酒氣江闊殺秋聲柳岸聞鉦歇潮雞脯

搏鳴

望君答翼雲

望君江上秋秋日下中洲楊柳枝孤館芙蓉花小
樓羈棲寒自警烟水暮多愁來是慰蕭索不來誰
塞畱

獨客

雨欲過山鳴先驅萬物聲鷹高捎捲葉海立動危
城日月糜前事饑寒赴令名秋思在簷溜孤影對
平生

迴首

知爾西風裏愁思下織機
愁時嬌女問何日阿爺
歸積夢易爲病浮踪難寄衣
新風吹桂樹迴首晚香違

雨晴

北風驅重雲三日未肯息
南方虛空處巉巖鐵圍
塞遂使江上波飛過柳梢白
遙憐天邊樹低合沙
脚黑獨傷風前心阻絕
歲陰客豈無客中夢臥
厖簷下滴今朝寒日出凍影
水氣積蒼茫始欲上慘

淡如有惜仰面不敢視視之冷逾逼况當病始愈
酸目風稜刺昨日我寄書兩大舟楫隔少致朝昏
需路近乃遠極不歸同苦寒且憂不得食人生有
妻孥仰給一人力汝曹守饑寒愧死難塞責不如
相見歡甘心受交謫自來知汝賢未嘗愠朝夕當
我萬里別坐汝三年厄謂汝告艱難而汝且慰藉
及乎勸游歸冷厨好顏色我貧汝習苦使汝助織
織家人衣被餘猶可儲甌石在我監汝勞而病不
汝借翳予拙趨謁朋友笑我直先師有遺言執鞭

豈吾役窮達生已然勤惰貴自識予生無怨婦離
合私順適命也何可言太空莽寥寂

城南村居諸君夜集因道十六日葯房北
行

寒晴人始出久臥忽江天風息村林淺舟迎听日
圓書堂五橋市鄉夢百花烟且復淹留安相思已
六年

衣是新風寄人如舊雨來來於三載後酒缺一人
陪

余前三年約與黃藥樵劉翼雲同
來蹉跎幾年而藥樵物故久矣

生死中年淚

江山倦客回爲君拚小別鄉信謾相催

是處好風物我鄉何足誇多君富文酒同里隔桑

麻近問羅含宅空孤楚畹花

是地與石潭羅海韜相近海韜客邕州

還將石潭月來繫鹿溪槎

鹿溪村中地名

回首望江城城寒聞暮鉦紆煩故人語爲送故人

行梅月花開屋冰霜海內程茫茫此天地吾輩得

離情

素馨花詞二首

越女摘花肌抱雲風吹不去化香塵羅敷髻上三

竿日待與城中早起人

越娘黃昏莫穿針穿花作燈花不禁花輕烟重一
宵盡孤負中間明白心

葯房舉孝廉矣瀕行贈之

北海孤墳惜南淵西山羈宦憶東川

謂周肅齋

一生一

死中原闊臥病傷離澤國偏蔓草池塘君獨往春

官桃李士三年身心悲喜關榮落舊雪新袍路八

千

葯房上番與弟玉洲同北
今玉洲死已久故有五句

葯房北行因之寄黃上舍仲則

景仁

壯歲常不飽此生誰與狂東南海雲中茫然還故鄉
魚山昨南歸憶我病在牀紆迴寄君詩三十殘
三章周令爲之帙鈔者其兩郎支牀一覽竟天水
生清光化作海上峰三十三劍鋸吁維百年來新
城賸粃糠遂使竈下姬競爲時世粧得此手巨刃
爲我摩天揚君爲天上謠笙鶴空翱翔衆人仰而
和引聲絕其吭庶幾聞鐘鼓和聲奏陶唐嗟予海
隅士三十猶面牆讀書走八蠻乞食歸五羊貧賤
好咏歌踪跡集謗傷甘心守性命竄之滄海旁積

書二萬卷昔被大火殃不得耳目新陳筭腐我腸
鬱鬱欲有語抱葉鳴寒蜚徒然住花村食臥俱芬
芳居恆內撻局流言外飛搶予死有哭者不及殺
我強卑微一身小喜怒人何常子雲果自信後世
誠荒唐得與君同時又阻於遐荒碎瓊爲君道勞
魂極周張予生且芒刺况君才莫當願君絕塵步
風雲力高驤世語不得交人亦不可望時時吹天
花飄墮空中香願因西北風吹落我衣裳天末暮
色動浮浮氣蒼涼落日照脩竹美人思未央

和答林處士見贈之作時同大通寺

海上晴天饑鳥飛村中別櫂野人歸雲潭烟渚霜
鍾潤竹月蕉風佛火微和靖老年妻子好維摩病
楊夢魂違非關龍性難馴極自笑狂多道力稀來詩
有龍性難馴
匪一朝之句

大風城中還過大通寺夜讀華嚴經作示

諸君子

風旗送客影颭航搖動滿城之夕陽江天小亭僧
獨出蕉竹舊櫺吾小康信手華嚴十住品微疴居

士四大床萬象勞勞幾時靜我心孤月定中光

懷張葯房呈翼雲三首

南淵東坡度嶺時首春五日偶然期試尋髯李相
思處曾拘梅花南向枝

林裏長江江上山離人紆遶落黃閒君知萬里三
年路一軸離愁共往還

贈行秋林
送別圖

遠接離心近接春年光去較客程頻劉生不許遙
尋夢才自雞鳴喚醒人

詠寒月

樓頭今夜月茫茫
天地勞人幾望鄉
後夜月遲歸
權急入門潮浸一籬霜

別范上舍璧如

瑛

暮節風霜逼君能惜我
寒晚歸薪水短兒未得親
安別日鄉心裏危軀衆口端
無論路遐邇亦有涕
沈瀾

示別翼雲

天遠愁還暮江喧夜更風
夢於身去住雲壓水虛
空兩月同高枕殘年且別衷
我帆行可張未是斷

根蓬

大寒節前二夜作

屢決歸期費幾旬
小除夜接大寒晨
從廐別日資吟夢
祇有高歌厭鬼神
妻念客遊操主禮
花先農事隔年春
還應小女增嬌慧
時唱新歌也背人

錄別張大谷十二月廿五日

柴烟糞火題詩處
去馬來牛作別時
爲設維摩花雨榻
無煩高適草堂實
身先夢去惟應戀
客並春來不肯遲
知爾看花還惜別
短篷疎櫂費相思

張君

爲設居停之所頗整潔云

五百四峯堂詩鈔

卷之十終

五百四峯堂詩鈔

卷十一

順德黎
簡簡民撰

辛丑年

春夜

殘年卷殘帙春日載春愁餘雪響明竹獨寒生敝
裘客貧兼病返詩懶待花酬只恐芳時急勞心不
暇摻

別懷

香齋詩集卷二
條風蕩情樹初景奏言禽春嶼烟波暖村花樓閣
深吟懷若怨女別日對離琴芳草空庭暮歸人萬
里心

村晚

村晚青陽亂春條弱受鴉綠陰三里草紅壓一層
花鯉碧魚苗水香茸雀舌茶未愁菲飲食隨分課
桑麻

落花寄顏上舍秋田

平

春庭風物對人靜時小動人惟落花狼藉滿村誰

料理狐疑歸鳥竭菁華百年萬事交遊倦二月三
旬坐臥奢修竹名園顏子巷故人臺苑付啼鴉

寄石帆十八韻

貧與吟難免名殊位絕卑室同多病婦君有負薪

兒南食添奇字

介卿爲龕姑詩潮語龕安岡切水族也非龍非介故云

西齋

愧特知文章寸心內盧駱衆人爲庚子庚辰月洪

濤洪聖祠燒天滄海日赭地木棉枝空濶橫古今

滄桑入涕而蓮洋合塵變花石作波吹

蓮花洋花石塘皆其

地也今皆失

碑剝摩挲得山存指顧疑高亭一舉酒浮

東坡先生集卷三
二
梗又何時乞食肩書出儲錢買藥資夢勞防作牧
客久憶烹雌太白君前世維摩我本師勿忘秋被
薄來問故巢羈初燕緋桃水春雲弱柳旗棘闌閒
會面花節再相思會面愁於別相思瘦似詩題詩
寄山館山雨暮低眉

三月初六日

三月初六日雨晨寒復晴落花秋意薄新水病魂
清葉弱涎蝸妥風捎乳燕驚小詩春蘊藉轉藥氣
和平田綠暄光膩桑柔露色明窺臨自爲笑衣食

有生成

曉立

微雨過江亭空江雨氣青柳深樓角銳沙曉樹根
冥養疴眠傷別憂農春早醒蘋風動衣帶流丐自
郊垞

暮立

雨重晴如霧江深晚更寒曉將昏作色雲就樹爲
團漁爨蘆烟濕鷗眠浪翅漉物情時便息吾道默
相看

絕句

春潮春草綠滿野桃花李花明壓簷高樓遠色冷
於水細雨斜風人下簾

大夫岡懷石帆

大夫岡頭落日黃海流東去作滄桑我家一曲鴈
田溔君近萬山獅子洋塵埃風浪移今古離合身
名有短長對此傷心兼望遠雨簑烟艇夢蒼涼

閑暇

瑣碎竹窓日薄光桐徑陰苔寒未宜簾風軟尙驚

襟對鏡懷來世飛花動往心
晝長簾影直閑話與春深

無語

無語宜春暮含情持弱心
蘚濃寒露屨花落漾風襟
別日多難惜芳時短莫任
夕鳥窺小立爲噪雨痕深

示內人歸寧

幾灣春浪軟雙槳落花紅
衫薄剛支病江深約有風
外孫猶少女而父慕梁鴻
陌上花開急歸防緩

緩空

內人歸省還

楊柳曉依依桃花水滿陂暖波恬戀影香雨軟濛
絲白袷空江色青雲重鬢垂羅敷自今出不使路
人知

來日書示

信宿汝歸寧來朝我入城近知數日別急似晚春
程勿作大江夢浩然春水聲檢詩兼飲子吟病可
憐生

石榴花歎

東村移歸石榴樹三年花開人去家今年花時不出戶滿意相待看萌芽二月三月簷外花紅紫代謝春驕奢亭亭芳桂照綠簾簾烘日赤暄蜀茶海棠側蕾負重葉夜合硬胎含素葩瑣碎草木各自媚此獨柔靜無矜誇去年爛漫纍枝弱女童劇圍雙髻丫春風手暖剪紅紙小庭對落萬片霞昨日微醉村酒歸隔鄰一樹紅欹斜軟風拂拂颭白袷有似天女隨維摩今汝不花吾柰何元都桃花千

書唐詩集卷二十一 五
樹多劉郎不來多則那數年手植不及眼一春花
事今有涯明年此時我何處縱汝未老人齒加自
傷兩眼厭榮落金屏玉樹空繁華今年花落坐百
感不見汝殘無汝嗟吁乎造化戲人世朝夕更變
風吹波至人暝坐方寸定萬物在外隨紛拏

楊柳

春水可將迎春深入有情相思無處所楊柳似生
平枝弱猶勝別絲長更自生低垂送行色還作斷
腸聲

題內子禪病圖小影

孱軀縱長心深汲繹短綆流光導青春芳懷坐交
警與子同今世電掣火光猛命瀕數死在貌以憂
生請倚瘦勿窺鑑增寒不臨井自云聰明薄上咒
昧無等女子本柔弱根塵轉強梗豈如君身骨仙
種發真省簾波落桐陰窓日碎光炯傾花積殘露
燃柳引恬頽微謔傳常情忍笑洩俄頃通神語先
和防禮襟再整減頤若爲惜約範已自領淡然山
林姿昭質含至靜體安景與適庭虛物皆屏金仙

上莊巖慈竹側幽冷亭亭風露姿寒意上鬢影子
惟病維摩煉藥對石鼎夙業以子故安忍死割瘳
他時兩縑卷佳話溢五嶺我不離眷屬而得清淨
境倘嫌梵天俗何必佛摩頂

病氣

未能遂無怒病氣十二年時時忤眠食習苦成自
然我之於爲人何知有所便無樂不見苦得過易
爲安身與命俱薄生微情可憐俯仰信大化生死
接踵閒身名不相屬何爲學神仙形存寓諸戀短

愛受長捐當前金玉姿言語重邱山血續存者淚
風滅逝者魂嗟我病榻中臥閑人鬼關紛紛就冥
路昨日生猱奔而我病夫子衾枕託枯禪

雨晴

雨色兼天曉林容助日光鷺飛新水濶帆極宿雲
長待旦風雷內多寒荻葦鄉濕花流不了紅弱亞
籬牆

聞石帆客游歸數於雲隱問狂簡消息

李白遊人閒高攬碧海月自無甫適輩萬物一不

屑夫子戲萬象排挾造化窟天才駕風颺百氏畏
鞭撻八駿於山川乾坤納周折使之旋蟻封寧有
死露骨與子隔年歲江湖濶茲別故人各輕肥裘
馬出南粵京國風塵中夢寐兩懸絕豈忘夙昔誼
不暇事毫札飄零二狂士到處觸炎熱伊昔閉窮
冬各擁大布褐生死守區區微命兩旬雪文章死
則貴身事生已拙平生寡真侶今雨更孤子去年
迎妻兒倉皇賊中脫處置畧安飽始得就去轍回
首深念我別路憐不悅臥病空江濱江聲助寒節

不歸一身病歸矣朝夕闕自諒筋骨固實謀妻孥
活謝君山林姿刀箭日趨謁退食猶披執就我問
饑渴涕泣動中感萬事腸一割身卑骨肉賤地僻
起居歇臥聞我顏子踉蹌受顛蹶往日此堂上數
子騁紙筆高墻照冰霜蓮燭映篇帙幾年如一家
一別無幾日雨散賓主情他人入其室摧眉負慚
走千秋愧明達是時問吾子異縣坐幽咽共思同
學輩秋街馬蹄疾憂憤雖自形羈縻義暫缺於今
各不見相思迴天末五羊三都富游塵雨雲密何

知萬億內獨爾坐蕭瑟空村弛時歲昨者偶然出
知子仍窮歸於我故蘊結惟當恣高歌激割金石
裂榮衰與離合往事悟一切日夕山海陰獨立搔
短髮浩蕩風雨勢翻覆江海揭虛堂寸火內聲色
外漫滅

絕句四首

碧草如波點白鳥鳥聲滿懷涼叫風隔溪鳥去水
花落曉色清光微雨空

鷄鳴村靜雨轉細萬種不思思晝眠忍聞穉子蓋

荷葉籬內踏潮喧踏天

晚爨出林烟氣清風吹不去雨還生
門前瓜菜歸人渡紅翠壓船波底明

晝眠不厭江上雨夜夢稍宜江上風
鱖魚酒近故人遠穩睡瀟瀟斜打篷

昔游近感六首

十年遠夢在邕州馬退山前坡上樓
野照蒼茫濶風色關雲盤鬱起邊愁
醉鄉日月淹秦觀別路鶯花送杜秋
萬里死生俱寂寞西征哀淚接南浮

陳觀

號醉
鄉

拾遺才調出飄零賈傅悲哀失老成雲外六千金
馬地夢中七十木棉城謀生行止皆離別垂死知
交倚弟兄古處已亡吾尙在後途何以許生平

西北高樓山色中六時遙碧畫睂供去人玉淚山
陰雪別日楊花野渡風只有啼鵲能勸客不聞鳴
鳥尙栽桐百年甚遠宜安樂長久相思待令終

呼鷹臺上縱霜翎九面秋光壓洞庭楚澤風中掀

地白君山雲外切天青能歌郢里餘鄒衍

鄒雪巢
却辭襄

陽府幕席又考落桂林府諸生有文名狂聲賣卜荆門有管寧管晏賣卜能文

西去東游兩孤鶴雪巢入黔管晏入浙中原南海少微星

天下古文歸北海李南嶺南時雨號周公周士孝肅齋令

新寧將去官旱祈雨而應邑郡名士爲詩頌之署曰周公雨灌園地與林宗潔

郭樂偕隱天憐呂範窮呂介卿珠海夜遺神蟀月今年

張粲夫落第瀛壖秋壯石鯨風馮敏昌居詞館死生榮落皆離

別七載無心一塞翁

何處河沙得衆香吾鄉衣食盡芬芳風波今昔生

涯遠冰雪聰明國土涼吟咏太平惟景物陶鎔天

巧合倪王一身凡百如殘夢黯澹支離不再嘗

雨熱一首示李郭呂謝諸君懷張葯房

南海瀕海居一日十暘雨雨從東南來魚涎散飛
鹵驟響掃萬瓦濃汗流四堵高雲黑洶洶盤空突
餘怒層隙漏赤日血色沸濕土盛熱如刺膚狂顧
無處所揚蒲風交衢騰氣烟霧戶懸識溟渤外蛟
蜃觸鼇柱鮓鮐焦鹹沙萬命一臭腐想當中原內
南望氣鬱苦寧知滄岬人安生火中鼠是時南歸
客北路萬里許猙獰火山雲岳色喝齊魯不敢思

長風吹沙灼睂宇况乃遠失志中熱執猛炬道聞
甘肅疆逆稜整

王旅邊鄙本雪窖威變殷地鼓炎風動龍蛇驕陽
助貔虎一隅銷撮塵四塞走雙羽彼方挽天河穆
穆洗千櫓歸軍歌風臺習禮勞酒脯如何下第者
病渴尙修阻故鄉雖炎瘴中道可容與子衣如輕
烟泠然欲霞舉赫赫萬象燥肅肅一靜主諸君列
禦流齒冷無熱語惜彼冰雪肌暫逐烟火侶乃知
炎涼區亦在所自處清波照城郭碧幔展樓舫方

歌颯成秋當伏不知暑千頃潭上月待人無今古
君乎早歸來相期候風渚

寄邕州祥上人

昔遊寶蓮寺師也吟者侶蒼茫野田盡鐘磬出林
莽石橋架清流萬木一束俯莊嚴僅形似石佛制
絕古尙疑生雲根夜氣洩靈乳寺僧不厭拙愛客
心所與旣無涉俗禮又不作禪語日昃野飯飽歸
路久延竚峰巒疊遠大陰晴入吞吐茫然已昏黑
不得一把炬平郊忽霧霧叢徑安可取指燈投孤

廟手足沾濕土始知雨濶絕百里滙一字雨脚與
遊脚歸此一處所茲遊不終日憂樂乃如許屈指
將廿年人事詎堪數予生少至壯師行老猶苦儒
縉雖異流根源豈分戶東西數千里跡隔神不阻
扁懷各定默身外盡雲雨翻覆本世情達者混而
處久冥一展臚天青沒纖羽

寄馮編脩魚山

敬昌

奇人絕壁圖係以長

句

牂牁西來勁箭直廿年曾是牂牁客信手時畫江

上山閉目可數水中石君昔取道此南下一月精
眸養奇碧山川窈窕詩鮮新已入狂簡之墨跡把
君詩句按予畫索驥人閒數相值及君飛騰上青
天中原山川助聲色我獨出門北向笑索米時人
住南國花田往歲攜我畫此時應懸玉堂壁西山
隔城接突兀飛入松嵐動朝夕中有赭衣人不識
秋風釣絲滄江白射濤掛席萬里心天水無窮我
機息休文腰削畏攬帶管寧貌野宜岸幘赤明深
洞病辟穀雨花冥冥置床席結喉煩頽一何似寒

巖死樹僧凍瘠濕灰暖風吹或起時復神崖劃開
關惜無好奇列禦寇看我垂足俯而射有時天末
還遠寄與君發興滋筆力有詩當復擲雲際無句
猶能坐相憶相憶空山雨雪深子桑病矣誰進食

寄陳道士

居羅浮

吳筠性高鯁請隸道士籍不死今猶生萬慮死已
寂吾師出江左俠骨冰雪白避名投嶺南苦貌鐵
石黑鋏癭示不語屑字怪已極時復見出語當飯
噴滿席三年同道流不見幾回食食或盡盆盂去

臥峯頂石一臥無了期萬象入一息釋道多怪行
高者泯其跡矯異凡衆中肉眼翻易識高高飛雲
顛僅與天咫尺漱濯滄海日霞光滿靈液守雌入
寥天支離遠全德

村口沙田長句

清川蘆葦連天長上有夕照渲微黃幾時得暇展
青眼終歲極勞如綠楊望遠傷離半生足歸風暮
雲千里涼朝來扁舟駕山影俯眎萬壑膠澄光

溫譽斯贈研歌

堅不必李廷珪墨滑不必澄心堂紙胸攢兀兀千
丈山袖攬盈盈一方水水氣六月冰人睛掬之欲
漾皴未平遲疑着墨尙可惜安忍看其初琢成交
疏風掣芭蕉聲急雲過雨几席明漏簷日色透深
紫一掌天痕浮衆青滿意矜能爲君畫膩墨如膏
碧相射但伴青袍過此生未許黃金議高價大夫
岡青蘿峯壓江山影西樵東草堂竹門敞不隔江
波山氣遙爭雄盡能排闥萬象入恐復搜牢餘技
窮不如養疴向禪榻耳目無好烟雲空邇來避暑

大佛殿行者逡巡爲扇扇作書三日神態倦今夕
旣雨行坐便呼童重爲開此硯題詩颯颯竹響深
竹外泠泠墮冰霰

三更

暮潮兼雨色不得入城涼秋意三更動閑愁別夢
荒鼠饑窺暗火蟲競逼虛堂默默看銀浦無波可
有梁

絕句

門外溪光入碧桐晚涼開卷教兒童時時葉打行

人着不禁秋來屋後風

夜過麥文池

右民

今雨舊廬朝暮見後時前事信疑聽燈邊殘夢中
年淚門外銷魂萬里亭傷別傷春髮爭白故山故
友眼俱青書生性命甘天竄風絮何曾與暫停

萬里

亭文池番
禺村居

歸思

秋海恣風濤身心亦已勞逾時碧梧落今夕白雲
高病警先寒節吟多厭素豪抒憂何長物歸篋得

離騷

謝雲隱贈王逸章句古本

昏鴉

昏鴉像遊子晚色動歸心
謀食與人飽託巢慚汝
深霜威先一葉海氣暝孤林
共勉綢繆力予維愁
歲陰

雨夜

客居無片葉何處積秋聲
吼浪飛城入懸河溢瓦
鳴眼於寒檠碧影到古牆
明近與安期約看山幾
日晴

憶昔行

憶昔黔山臥樵者作詩鬼門弔人鮓黃昏碧火行
木客陰洞雄狐拜金馬荒山性命寄鬼神藥囊苓
朮揚灰塵陳生床口來切病巫角聲中間死人昨
日相逢今日死故鄉人作殊方鬼半人半鬼憂懼
中白木欂栳青筠籠出門撫額涕淚語入山刮面
冰霜風晚歸煉藥土竈爛昨夜山雨飄濕炭腰圓
腹大操苦辛熱嚙狂嗔耐呼喚同命上船始啖粥
回頭滯骨誰奠飯吁嗟吾免後人哭頃刻魂爲數

君伴戕河水急東流深白日清波千里心秋風孃
孃吹江水別酒茫茫空古今此生日月成今古故
鬼松杉妥風雨千年馬鬣須貞石一慟龍山餘濕
土土濕不乾秋草碧秋陽照我心獨苦青衿將穿
髮堪數

以硯贈郭廣文

濟川

平生兩遠跡俱以倦遊還匣此一片水靜含千里
山憐君著書老如我判身閑薄重兼輕膩深宜行
麓閒

短句

七月星宿光夜靜警秋氣去年大江柳吹葉滿天
地病客畏其影海月無處避今年健軀勞心與衆
芳瘁歸帆轉青蘿水色互空翠送人入村扉依依
似相慰

秋風

秋風吹白蘋江上獨離羣珠女水爲鏡花船波漾
雲南來月自濶夜警鶴虛聞莫復當窓織衣涼露
氣紛

獨夜陳硯有作

有癖已多累不畏勞我軀粲然第嘉名坐若懶祭
魚水氣初凍結細視中澄虛着手如欲瀉皴作波
痕紆平昔萬里遊歸來心手迂山川起病懶窅兀
來座隅粵人所愛石往往與我殊秋風篋團扇什
襲收璠璣豈惟絕雲烟久旱則恐枯我若列嬪妾
肩黛各自姝琢匣爲列屋不使其閑居執拂與秉
燭一一供吾需好色至此極生死誠區區佳人守
貞素金夫曾不渝

出郭呈李徵君正夫

一月始出郭淡然秋色深大江波更白涼野日浮
陰勞苦竟何事蒼茫無住心西風燈火夜非汝但
孤吟

往事

往事如昨夢悲歡空自知死遺生者恨來以去時
推悔在吾猶諒情多命不宜秋風行坐有元鬢汝
何爲

秋野

微陽下秋野野氣動蒼黃草濶漂涼碧城高走末
光蟬瘡抱葉待魚化入田翔時運詩成了東籬菊
酒香

禾花烏海邊人八月時見細魚蔽水而至一躍卽羣飛入田啄稻荳旬日之內亦不復見

鬱鬱

鬱鬱况秋節茫茫空夜心西風亂雲木萬象勢浮
沉水濶身如泛天涼夢不深無衣默多警卽事漫
難吟

秋色

秋聲擾夜氣秋色靜晨光水漕浮涼大山陰落影

長遠蒼生曉白深樹夾通黃撫景俱堪畫其如客
思荒

咏懷

到處有行跡此人窮可知寧忘愛性命而此試安
危自養天地物同塵貧賤時饑薦踴躍內容易辨
雲泥

秋歌

志士驚心視白日夜聽秋城海聲溢北風怒塞重
闔堅一夜奮雷伏不出城頭木棉力有神長枝大

葉梢浮雲朝來低瓦葉響息寂寂百家秋助薪客
愁鬱結如繭絆不及風天物蕭散學廢心荒苦晝
短身勞夢瘁何時旦故人遠客近復病獨我離居
歲云晏溪山可賣吾亦歸歸去濶絕開江扉席前
坦掌波濤入事後過眼烟雲飛烟雲飛盡空漠漠
先生畫筆靜方落不知何處臥遊人堂上鋒稜出
秋嶽

歸里

半載長長去今朝草草歸入門剛晚食開篋換秋

衣穉女解言夢病妻猶上機殘年守和樂難得共
寒饑

惜家園松樹家人析爲薪

六松隔水見朝昏有涼聲窺我草堂東花簷浮氣
青每每朝日出金碧交我庭枝疎鳥影滑九轉上
下鳴自從我南歸護惜過十齡先公手之澤至今
枝上平我行屢回首我還則相迎今別半載歸謂
共寒歲情有米薪易致落葉不可勝未聞儲升斗
坐使食不成茲松本無欲何怒於園丁劓之旣淨

盡一木空高撐使我疑帆檣曲岸隱巨舫况乎持
刀斤緣險如猴鼯危已以戕物恐復爲物攫命物
互得失多陷而少明語人轉自默命物何重輕

花籬

竹籬花月夜冥冥去日前宵香滿庭看得客花都
盡了天風畱此小藤青

寒夜課甥學憶四妹

天海交寒雲作團風舟傍岸屢翻掀蒼涼日色沉
沙樹悲壯江聲入水村舊易牛衣仍長物遠難雞

子叫新魂

邕州俗以雞子置米上懸紅布竹枝禱於祠以招魂

冰霜絕塞欺

枯腊寸草青青念報恩

憶母舅山莊

十六歲讀書於此別二十年矣

虎豹輪囷黑石叢蘭泉雨牖腋飛虹午移山鬼開
銅鏡夜禦熊人響鐵弓雨外簷晴千嶂日吟邊衣
卷八方風廿年矮屋滄江岸已似舟居作釣翁

寄羅海韜邕州

西風葭渚張蒲帆愛咏嘉魚耀石潭

石潭其村居

花藥

芳洲秋水外芙蓉仙館暮邨南

花藥洲相傳在城西芙蓉村名

蕉

中峒客青螺髻竹袖蠻姬赤汗衫
地遠艱人事惡故鄉書費故人緘

獲時刻畫兩筒以籠袖異

寄溫中書步容

汝适

并索藥酒

滯跡枯風起濕灰慚君年少挾天才後園舊作銀
床井大婦新歸玉鏡臺筵上肉聲高裂竹雪中心
火熱焚槐惟應惜我長卿病遣致瑤京瀝露杯

於梅樹下作寄溫中書

故人村靜百花殘祇有梅花相問寒似此疎狂是
真侶比渠清貴豈麤官坐須宏景三層閣岸煞泉

明十載冠直得夫君照幽素貧時歸去病時看

纓珞樹下作

齊簷纓珞樹汝亦柳絲絲長大出頭地阿那憐小
時剛柔天定命松栢歲寒姿此樹冬不改色爲謝東風絮
休來附弱枝

十月中旬葛茶已開於花下作

預恐主人春作客深紅硬綠小春看入門自媚都
如此對酒當歌相耐寒霜後園林三徑紫風前枝
葉寸心丹未能豔判芳情了遮莫將身與爾安

寄陸徵君貫夫

紹曾

白下烟波畫裡船
朱方梅雪夢中天
士龍實是鸞
鳳子帝虎虛糜犬
馬年歆器周銘
通欵識追魂
唐版藉煤氈
何當遠道儲丹碧
風雨松陵對榻眠

寄鮑青海

南雪小於剎
佛庵蕉竹聲閣虛
鐘自響夢了火猶
明別思花驚酒寒
威海照城舊曾諳
鮑叔今復似
虞卿

齊書

貧士儲書籍頗如公子荆病軀多客旅還似馬長卿懶已題籤亂勞於運甕輕未須慚北阮猶與暴南榮

茶一首

野人甘木食飲水亦儒生方法須香婢膏肓起睡卿品佳甕較碧風準火通明豈爲治消渴時堪代解醒

寒江

寒江東浪逼西樵蔽海來鴻逐怒潮蟹舍水松低

宛轉蜺塘風荻偃飄蕭倦遊長物歸長缺在野生
涯託短謠天末相思况遲暮小山叢桂好須招

寄石帆

山人幾夜夢寐靜曉江無風凍如鏡西樵寒翠入
九江七十二峯懸筆正江山如此無此客來趁山
陰暖乘興還聞毘耶臥示疾吾恐饑寒無暇病一
寒正愁十日雨敝裘蹭蹬不掩脛樞衣跣足出不
得坳堂宦杯舟下碇仰面空林高指天兩禽一葉
相爭競右梢左撥葉亦墮背負青天棲轉定人生

拂亂有茲理士節高堅見吾性卅年旣悟非材罪
百挫直可以氣勝同學卽今惟爾我窮廬在昔有
賢聖務全吾足猶能補憎茲多口焉用佞後途何
以語我來前事已看成破甑

腹痛

長吁暮南郭減帶過東陽一月亂腸胃百年知短
長起居惟隱几書卷併黏床有愧何徵士全家問
藥方

白鳥

冥濛海雲黑白鳥獨無歸影畏清波凍身兼片葉
飛江天容耿介冰雪照寒饑倘入南人貢還應世
所稀

海水

大水天寒曉吐雲蔚如陰火澤中焚神淵暖洩蛟
龍氣烟海遙呼鴈驚羣蒲席半生孤往願蘆碕何
處答歌聞風波祇與勞人得況是江湖雨雪紛

東望

水村東望濶山影截江來日耀青蘿嶂雲膚白蜺

堆三忠臨海廟九眼伏波臺暮色疑風雨潮音洩

奮雷

白蜺堆
燒灰處

望縣城寄潘上舍景最泰

眼寒極天水高浪入諸峯城白人烟淡帆陰海氣
濃病猶身側望藥待絹斜封爲報思君久關門欲
禦冬

風起

風起同雲黑潮生下國凉水村如泛海南雪僅爲
霜鳥聚行人少橋高立影長傲裘慙野老餘布木

棉裝

冬菘行

冬十二月朔二日大風翻江木欲拔客來叩門遺
菘菜北雪猶能照肌滑初如苞筍蠢可嗤細抽不
盡心卷施葉柔未綠尙塗粉莖薄漸黃憐脫衣北
方佳人好心手霜鱸作鱠銀鱗肥此時斷菘不照
眼素盤薦饌冰琉璃不禁饕餮思大嚼恐與胡蝶
俱雙飛風沙遷地九千里僅沁清齋太常齒灌園
直訝廉士妻沸鑊幸遠貪泉水故人李南澗官厨

亦骨董食餅自號中原僖買蔬且美端州種

南澗食蔬

於端州有詩云遷地弗能良猶可
歷南蔬又詩我是中原食餅僖

幾年歸骨古齊

州時食還當薦首邱可知藜苳閉關客勞甚南魂
天盡頭

出門

一月粗還里三冬獨出門縕袍長掩脛江路白銷
魂狎鷺頻依槩饑鴉不離村四郊春意動芳草識
王孫

還廣州先寄石帆

稍別相疑病還來互慰窮前途一車鬼後事兩山
翁白日照流水青春歸朔風可能家課了梅雪郡
門東

客樓

竟夕江聲抱客樓北風翻海大坤浮殘年底急催
元鬢賤客禁寒負黑裘隙月似人窺屋角大旗如
浪沸城頭寄書祇道頻頻夢三夜茶鐺護醒眸

清江

清江清不極泯泯肅神魂日驗魚龍氣苔行蚌蛤

痕層寒動城影平碧混村原垂釣吾將往虛舟寄
海門

斷柳

江波照斷柳不礙晚天青此樹如含怨有誰無故
情人閒客路遠別後秋風生往日珠娘髻今晨畏
鏡明

風歇

夜中風已歇剩得片雲翔月午懸鴉影城寒定水
光人歸五更夢花碎一村霜早晚鄉帆急煩君送

客裝

喜葯房還先寄此詩

去時雨雪病離羣病久歸遲起覓君先得誦詩知
水陸卽傳看畫感風雲沙塵北轍勞南夢雞黍登
堂却上墳謂青州李南潤乞食入城容洗足許談哀樂野
人聞

寄虛舟

花村吟夢感違離澤國招尋憶曩時山含海氣松
杉濕人定波光舴艋遲尋常潮水分江路五六詞

人兩畫師至今風雪猶輕出往日潛夫挾纊隨同

梁石癡
能畫

十二月十二日題寄內子病中

年月爭相暮風雲不競愁獨眠君受夢同病我登
樓衣薄宜今歲天晴似晚秋歸應與春色幾日到
花洲

別路無遠近出門成越秦情人長夢死畸士例居
貧鬢影看書夜庭花入鏡春日來應減藥風景况
停勻

馮魚山因葯房南歸致書

五月都門人去留側身滄岸獨披裘路經南北淹

文翰書併風霜下釣舟

五月二十二日出都十二月十二日書至

白帽

從教管寧着蒼生宜付謝安憂燕臺知有黃金在

敢按真圖進病驕

書云久託神交所祈自寫小照寄來爲慰

五百四峯堂詩鈔

卷十一終